

富順縣志卷之七

公署志

縣治舊踞神龜山南抵大街東抵文廟西抵西湖北抵元妙觀洪武十年知縣鍾鉉遷於北街卽舊布政分司十三年因水冲激主簿丁翁歸奏復舊治與知縣崔藝同徙治署於舊處正廳五間正統十二年丁卯知縣李真重修加建後廳正德七年知縣童綸修譙樓樓前昭勲坊僉事蔣信題嘉靖二年知縣周夔重建左右六房抱厦十三年知縣楊登修建二堂始建儀門崇禎甲申賊報方驚縣門忽頽後毀於兵燹 國朝康熙八年知縣金肖孫買官房

富順縣志

卷之七

公署

一所重修規制始備康熙二十二年知縣錢紹隆奉頒

御書

清慎勤三字懸於大堂康熙三十三年知縣衛璪重修譙樓樓今廢乾隆三十年知縣葉體仁建修四照樓於大堂左乾隆十九年知縣熊葵向於頭門外創立富順門二十年乙亥重修大堂左右吏書十房二十一年丙子重修署右西湖樓二十三年重修二堂并創立廊房於堂之左右堂前增修甬亭內宅在後堂之東北宅前康熙年間知縣錢經紳題自公二字匾額戒石亭旌善亭在頭門外西申明亭在頭門外東今重修移在頭門西官庫舊在大堂右隆慶元年知縣邱齊雲創造磚樓於典史署後今移至二堂右

架閣庫在大堂右今廢監獄在署西南道光四年知縣宋廷楨改建乾隆五十三年知縣潘邦和詳請借領養廉銀一千兩捐捧銀五十二兩零修理頭門二門大堂二堂及左右書室嘉慶九年知縣王銓於二堂左建簽押房三間十五年知縣張利貞修補聖諭牌坊十九年署事知縣謝維傑補修頭門外石岸於富順門前砌石梯重修西湖樓迎賓館舊在治署東萬厯戊寅知縣秦可貞建迎賓館有記久廢道光六年知縣宋廷楨改於大堂東

明知縣但元貴題名記名之記者始唐人以壁厥後漸用石名無煙滅矣國朝以來無論內外秩秩實一石至郡邑亦然近多殘闕

富順縣志

卷之七

公署

二

失次有司視先後去畱爲傳舍遂置之高閣嗟嗟抑未識餽羊意耶夫先後時也時無及也去畱跡也跡靡恒也可無識矣乃若人有直枉政有良窳則於後先去畱間毀其名及地洎若科甲其直與良人閱而譽之慕之恨不見其枉若窳則指之疵之至奮口嫻詈不自禁彼慕且譽也能無興乎疵且嫻也能無思乎以勸以懲在於茲矣第守令視民最親又經生朝離章句夕習刑書繁劇投之豪巨伺之猾胥左右承望之倘一心希譽是亦窳窳者流安所稱直與良哉是故黨人之碑重君實瀛洲之選恥敬宗公道在人炳若日星誰能罔耶孔子曰不如鄉人之善者好之其不善者惡

之斯古循良矣是刻也創自肅皇乙酉計六十春矣當年如採運兵儲班班視今日若左券余細讀殘碑始覺天行之數後先一轍况守土者可以去畱自魚肉耶故記之以俟同銘諸君子 知縣錢紹隆早春試士詩滇池烽靖洗銀河橫海樓船盡罷戈共慶兩階看舞羽也教百里振絃歌冰霜鴻鴈驚初定春暖鶯花喜漸多重觀太平應獻頌幾人彩筆映江波

秦可真記萬厯丁丑余奉命來尹富順縣視事明日邑鄉大夫士咸造顧焉罔有不登堂者主客甚難之乃問曰邑不有迎賓館乎曰有乃命館客於堂而出迎禮之顧瞻再四僅僅三椽圯漏弗治

且樹塞屏後開視之則土地祠也乃問曰此迎賓館乎曰然余慨然者久之曰吁哉觀風問俗守土者之所急也乃請益之此不備焉得非爲闕典歟且主神於後而延客於前又非所以安神靈而尊廟貌也乃相土鳩工爲椽三楹南向爲迎賓館堂後建屋三楹爲土地祠不惟禮賓有定而事神且有專祠矣又撤去前垣樹以木柵釜江翠屏之勝一覽無遺煥然成佳館矣乃礮石樹碑爲文以紀之俾後之從政者知創立所自始云工肇於戊寅之春考於是歲之秋而督工之官則李逢先也是爲記

縣丞署舊在縣署後堂東明末圯雍正八年移駐自流井專司鹽

務署在井厰正街後山

縣丞署在鄧井關舊係通判署乾隆四年設二十三年裁改設縣丞卽爲縣丞署

主簿署舊在縣後堂西北嘉靖乙卯李文庠重修天啟乙丑何愛麟重修有記雍正年間移設西湖右爲典史署乾隆五十四年典史戴廷綸捐養廉銀三十一兩零修理廳署頭門二門大堂二堂左右書房等處

典史署舊在官庫後前爲幕廳明末圯自來儼居民房乾隆七年裁主簿主簿署虛因移治焉署後原建有八卦亭康熙五十七年

富順縣志

卷之七

公署

四

改爲知縣劉上駟生祠名此君亭嘉慶十五年典史殷繼祖改修三堂

布政分司在治東北正統三年建今廢

按察分司在治西北洪武八年建今廢

趙化鎮巡檢司在縣東南六十里今廢

經制把總署在縣西九十里自流井鹽廠舊無汛員康熙二十五年廠民因五方雜處公呈請委汛員彈壓建立衙署駐防於此外委把總署原無定所因自流井把總離城窻遠以一應塘遞護餉解犯難稽查經管於乾隆七年始設署在西湖左卽舊西湖書

院

學署在文廟左道光十七年知縣鄧仁莖改建明倫堂建正學堂屋三間廂房二間下廳三楹右隙地爲客廳書辦房二間頭門一向購民房一院爲訓導署規模較廓於前

試院在治署下街西邑中舊無試院歲科兩考應試人衆道光七年知縣宋廷楨督同紳士勸輸建二堂五間左右廂房各三間騎馬廳三間大堂五間抱房五間花廳五間厨房五間東西文場共三十四間儀門五間頭門五間書辦房三間差房三間頭門外走廊共四十間鼓樂樓二座照牆一座左右柵門二所週圍圍以磚富順縣志

卷之七

公署

五

牆進士朱偓爲記

僧會司

道會司

陰陽學

醫學俱在萬壽寺後

養濟院在縣西太平橋前廢嘉慶十年知縣王夢庚補修更名廣仁堂周以牆垣二十二年知縣張利貞重修正房及左右抱房八間咸豐十年因兵燹舍宇無幾同治六年知縣羅廷權委職員蕭億元監修計四重共三十餘間甫成居民不戒於火此屋猶存人咸謂羅公惠愛所感有碑記

新建試院記

富順川南奧區也。在宋爲監，在元爲州，特丁糧財賦之饒裕而已。其山川秀氣鍾於人者，歷代稱盛焉。若宋薛翁授易學於袁道潔，李見隱神龜山著易樞尚矣。前明晏振之少遊太學爲祭酒，胡儼所重得入內閣讀書，旋登第巡按兩畿，所至有聲著述。尤富與湯允勳、劉溥等號景泰十才子，熊叔仁學行爲當時冠冕。與成都楊升菴、內江趙文肅、南充任少海稱西蜀四大家。又與趙景仁、唐荆川等號嘉靖八才子。萬曆丙戌、戊子之間，每科獲雋多至十七八人，捷南宮者五、六人，前後得省元者九人左右。

明善以貧廢學，年二十九始讀書，人咸嗤之。未幾登第，文律精練，歷官知府，故人患不自立耳。天下豈有不可成之事哉？諺有之曰：富順多才子，聲稱至今未歇。而科目遠不及古，豈文運之興衰有時抑所以成就之者，尙有待歟？我

國家稽古右文，進士之方無所不至。邑之應童子試者，歲不下二千人，而試院未建，殊爲闕典。邑侯宋金甫先生粵東進士也，歲甲申來蒞江陽下車之日，余卽以建修試院請。邑侯難之，越明年奉上憲檄，添義學，邦人士咸樂捐輸。且曰：試院屢議未修，願竝舉而速成之。侯曰：善。於是相地平基，鳩工庀材，不數

月而輪奐巍然中爲大堂兩廂爲考棚列坐號二千二百有奇
前爲重門後爲二堂右爲書房左爲厨房周圍繚以磚牆外甃
照壁其旁設迴廊生童集候可庇風雨靡不堅緻共費銀一萬
四千三百有零事濟而人不勞觀者咸以爲稱異時歲科校士
及考月課諸生童橐筆而來隨牌而進認號而坐據案而哦抽
軋軋之文思動栩栩之逸興揮彩毫之鳳藻聽食葉之蠶聲由
此而府而院制愈密而取愈嚴體愈尊而品愈貴人地會其時
風雲際其盛多士之奮興繼起者又安知不突過前賢也當事
屬記於余愧不能文謹書此以爲多士勗樂輸諸君子例得書

名碑陰邑進士朱偓記

